



Han realisau l'exposiziun da fotografias historicas a Breil sut tshiel aviart, (da sen.) Gierina Cathomas, Silvan Gabriel, Michael Friberg, Annadora Friberg e Curdin Friberg.

FOTO ANDREAS CADONAU



Il vitg da Breil alla midada dil 19avel sil 20avel tschentaner.

FOTO RUDOLF ZINGGELER/BIBLIOTECA NAZIUNALA SVIZRA

In'egliada sin Breil d'avon 120 onns

Il Forum cultural Breil ha realisau cun sustegn da Surselva Turissem ina unica exposiziun da fotografias veglias sut tshiel aviart. L'exposiziun ei aviarta mintga gi e da tutt'aura entochen ils 24 d'october.

ANDREAS CADONAU/FMR

Exponer fotografias veglias ei ina lavur engrazieivla. L'egliada sin uclauns, cuntradas e viers carstgauns d'antruras anfla d'abia renonuschientscha. In pass gagliard ha la gruppa fatg che priu neunavon ina part dil schatz fotografic digl industrial e fotograf Rudolf Zinggeler. *Gierina Cathomas, Annadora Friberg, Curdin Friberg, Silvan Gabriel e Michael Friberg* ein sedecidi dad exponer el liber 24 documents da Breil che Zinggeler ha fotografau alla sava dil 19 sin il 20avel tschentaner.

Exposiziun en curtgin

Enamiez il vitg en in curtgin agl ur dalla via ein las fotografias piazzadas en format da biabein in meter quadrat tratgas si sin plattas dad alumini. Per ch'ils exponats possien far frunt allas lunas dall'aura. «Atgnamein era previu da plazzar las tablas cun las fotografias el liug nua che Rudolf Zinggeler ei seplazzaus avon 120 onns per fotografar. Aschia havessan ils contempladers gest saviu paregliar il temps entuorn il 1900 cun la vesta actuala sin cuntrada ed edificis», ha Annadora Friberg explicau. «Nus essan lu tuttina

sedecidi da presentar las fotografias en in liug.» Fotografias che dattan bia da discutir ed intimeschan da far ina tura tras il vitg per tschercar ils loghens e baghetgs che Rudolf Zinggeler ha memorisau sin plattas da veider. Treis fotografias ein tuttina aunc piazzadas el liug nua ch'il fotograf ha tschentau sia camera avon varga in tschentaner. Ina a Crest la Crusch, in liug che porscha ina egliada dalla Cadi siado. La fotografia da Zinggeler ei da fetg buna qualitat aschia che la Surselva d'avon tschien onns selai senz'auter paregliar cun la Surselva dad oz.

Sut la bitgetta dil Forum cultural

Realisau l'exposiziun ha il Forum cultural Breil cun sustegn da Surselva Turissem sco quei ch'il president dil forum, Michael Friberg ha explicau. «Singulas fotografias da Rudolf Zinggeler eran gia enonuschentas.» Dad acquistar il dretg dad exponer ulteriuras dalla Biblioteca naziunala seigi stau nuncumplicau, ha il president dil forum aschuntau. Sustegn tecnic han ils organisateurs dalla exposiziun retschert da *Reto Cavagn* che habitescha a Breil e posseda ina interpresa specialisada per realisar scripturas sin metal, per exempel

autos. «Grazia a sias enonuschientschas eis ei stau pusseivel da trer si las fotos sin alumini, per spargar ils cuosts ina fotografia da mintga vart dalla platta». Realisada ei l'exposiziun enteifer las festivitads che regordan al plevon e publicist Flurin Camathias. Ina brochura accumpignonta alla exposiziun lai vegnir a plaid ulteriuras persunas che han viviu ni visitau Breil el ravugl dil temps da Flurin Camathias a Breil, sco Giachen Hasper Muoth ed Alexander Baletta ni Georg Finsler, rector dalla partizun litterara dil gimnasi da Berna e hosp dalla Casa Fausta Capaul.